

IL SPORTEL LINGUISTIC REGIONÂL PE LENGHE FURLANE AL INVIE LIS SEDIS PERIFERICHIS

La nassite di cuatri sportei e segne l'invîasi di une modalitât gnove di erogazion dai servizis gjestîts de ARLeF

Il Sportel linguistic regionâl pe lenghe furlane si intricj di cuatri gnûfs sportei periferics che si zontin al Sportel centrâl inte erogazion dai servizis di consulenze linguistiche, di consulenze toponomastiche, di traduzion e di promozion de lenghe furlane. Lis sedis periferichis dal Sportel, viertis dai 4 di Fevrâr passâts, a son a Tumieç, li dal municipi, tant che riferiment par dut il Friûl de Alte; a Muçane, li de biblioteche civiche, pal Friûl de Basse; a Gurize, li dal municipi, pal Friûl Orientâl; e a San Vît dal Tiliment, li de biblioteche comunâl, pal Friûl Ocidentâl. Il Sportel centrâl al à sede invezit a Udin.

Il projet di Sportel - finanziât de Regjon F-VJ cui fonts de leç 482/1999 e coordinât de ARLeF - al centralize lis ativitâts che fin vuê a vignivin coordinadis dai singui Comuns midiant di finanziaments dedicâts. La gnove modalitât di gjestion, presentade intune conference stampe dal Assessôr regionâl aes Autonomiis locâls Pierpaolo Roberti e dal President de ARLeF Eros Cisilino, e permet che i servizis erogâts de sede centrâl e des sedis periferichis a sedin davuelzûts in mût capilâr a pro di ducj i ents locâi, dai ents strumentâi e dai concessionaris di servizis publics includûts intes areis respetivis dai sportei, rivant cussì a dut il teritori furlanofon. Il servizi al è garantît ancje ai privâts, se stimât coerent cu lis liniis di politiche linguistiche regionâls.

“Graciis ae ARLeF, braç operatîf de Regjon pe metode in vore des politichis linguistiche pal furlan, o valorizî il servizi e o fasin in maniere che al sedi plui eficaç - al à dit l'assessôr aes Autonomiis locâls, Pierpaolo Roberti - ancje parcè che cheste gnove organizazion e



© Foto: F. Rüssli - Bressanuti

permet di vè il control diret su lis ativitâts che a vegnin fatis”.

“I servizis ufierts di ogni Sportel - al à spiegât il president de ARLeF, Eros Cisilino - si riferissin in particolar ae *consulenze linguistiche* e ae *traduzion scrite* dal talian al furlan di tescj, la consulenze su la *toponomastiche in lenghe furlane* pai ents che a vedin dibisugne di prontâ la cartelonistiche stradâl e insegnis in gjenerâl e la *informazion e l'orientament* al public. Ta chest mût o volin garantî une metode in vore il plui pussibil complete de normative di tutele dal furlan”.

Il Sportel centrâl, cun di plui, al ufrîs tra i tancj servizis ancje il supuart aes ativitâts di politiche linguistiche e di promozion de lenghe furlane fatis de Regjon e dai ents locâi. Al garantîs ancje la assistenze inte ativitât di verifiche e di valutazion dal stât di aplicazion dal insegnament e dal ûs de lenghe furlane intes istituzions scolastichis. Al garantîs infin il servizi di interpretariât simultani in talian dai intervents fatis in lenghe furlane dilunc des sentadis dal Consei regionâl.

Par vè informazions su lis sedis e i oraris di ogni Sportel si pues consultâ: www.sportelfurlan.eu

Pagine par cure de ARLeF -
Agjenzie Regionâl pe Lenghe Furlane

ARLeF
AGENZIE
REGIONÂL
PE LENGHE
FURLANE